

同文
原版
淵鑑類函

盛秋署檢

別五上

原詩晉張華祖道征西應詔詩曰赫赫大晉奄有萬方陶以仁化曜以天光載跡陝西實在我王內任玉鉉外

惟鷹揚四牡揚鑣元輅振綏庶寮羣后餞飲洛濱感離歎懷慕德遲遲又祖道趙王應詔詩曰於顯穆親時

惟我王稟姿自然金質玉相光宅舊趙作鎮冀方休寵曲錫備物煥彰發軔上京出自天邑百寮餞行緝紳具

集軒冕義我冠蓋習習戀德惟懷永歎弗及何敬祖洛水祖王公應詔詩曰穆穆聖王體此慈仁友于之至

通于明神遊宴綢繆情戀所親薄言餞之于洛之濱高崖巖巖洪流湯湯春風動衿歸鴈和鳴我后饗客鼓瑟

吹笙舉爵惟別聞樂傷情嘉宴既終白日西歸羣司告旋驚興整綬我皇重離頓轡驂駢臨川永歎酸涕霑願

崇恩感物左右同悲王濬祖道應令詩曰侯誰在矣東宮說說曰保曰傳弘道惟新前疑協衡顧問翼輪豈

伊張仲專美前津渙乎唐德欽在四鄰齊軌上華永垂清塵陸雲餞太尉王公還京邑詩曰聖澤既渥嘉會

惜惜庭旅鐘鼓堂有瑟琴飛轡清暉扶桑移陰視景祗慕揮袂霑襟戀彼同棲悲爾異林我有旨酒以歌以吟

潘岳北芒送別王世胄詩曰朱鑣既揚四轡既整駕言餞行告離芒嶺情有遷延日無餘影迴轅南翔心焉

北騁孫楚答弘農故吏民詩曰昔我先侯邁德垂化康哉之詠實由是佐惟余忝辱弗克負荷每歷貴邦仰

瞻泰華追慕先軌感想哀嗟說說故臣爰及羣士皓首老成率彼邑里聞崇高義長幼以齒宋顏延之爲皇

太子侍宴餞衡陽南平二王應詔詩曰太儀在御皇聖居貞夢縝民紀仰緯天經物資感變神以瑞形川無遁

寶山不闕靈亦既戒裝皇心載遠夕帳亭臯晨儀禁苑神行景鶩發自靈囿對宴感分瞻秋悼晚梁王筠侍

宴餞臨川王北伐應詔詩曰金版韜英玉牒蘊精帝德乃武王威有征軒習弧矢夏陳于戚周鶩戎車漢馳羽

徽我皇俊聖千年鍾武德洞十門威加八柱金正圯德水行失道胡馬南牧戎徒西保薦食伊瀝整居澧錫金

闕揚塵銅臺茂草命彼膳夫爰詔協律樂賦出車弦操吉日玉饌駢羅瓊漿泛溢聖德溫溫賓儀秩秩

原古詩曰行行重行行與君生別離相去萬餘里各在天一涯道路阻且長會面安可知胡馬依北風越鳥巢

南枝相去日已遠衣帶日已緩浮雲蔽白日遊子不顧反思君令人老歲月忽已晚棄捐勿復道努力加餐飯

又曰明月何皎皎照我羅牀惟憂愁不能寐攪衣起徘徊行客雖云樂不如早旋歸 又曰涉江採芙蓉蘭

澤多芳草採之欲遺誰所思在遠道還顧望舊鄉長路漫漫浩同心而離居憂傷以終老 又曰庭中有奇樹

綠葉發華滋攀條折其榮將以遺所思馨香盈懷袖路遠莫致之此物何足貴但感別經時 漢李陵贈蘇武

別詩曰晨風鳴北林熠燿東南飛願言所相思日暮不垂帷明月照高樓想見餘光輝元鳥夜過庭騶騶能復

飛塞路踟躕彷徨不能歸浮雲日千里安知我心悲思得瓊樹枝以解長渴饑 又贈蘇武別詩曰良時不

再至離別在須臾屏營衢路側執手野踟躕仰視浮雲馳奄忽交相踰風浪一失所各在天一隅長當從此別

且復立斯須欲因晨風發送子以賤軀 又贈蘇武別詩曰嘉會難再遇三載爲千秋臨河濯長纓念別悵悠

悠遠望悲風至對酒不能酬行人懷往路何以慰我愁獨有盈觴酒與子結網繆 又贈蘇武詩曰攜手上河

梁遊子暮何之徘徊岐路側悵悵不能辭行人難久留各言長相思安知非日月弦望自有時努力崇明德皓

首以爲期 又贈蘇武別詩曰陟彼南山隅送子淇水陽爾行西南遊我獨東北翔轅馬顧悲鳴五步一彷徨

雙鳧相背飛相違日已長遠望雲中路想見來珪璋萬里遙相思何益心獨傷隨時愛景曜願言莫相忘 又

贈蘇武詩曰爍爍三星列拳拳月初生寒涼應節至蟋蟀夜悲鳴晨風動喬木枝葉日夜零遊子暮歸思塞耳

不能聽遠望正蕭條百里無人聲遠處天一隅苦困獨零丁親人隨風散漚滴如流星願得萱草枝以解飢渴

情 又贈蘇武別詩曰鍾子歌南音仲尼歎歸歟戎馬悲邊鳴遊子戀故廬陽鳥歸飛雲蛟龍樂潛居人生一

世間貴與願同俱身無四凶罪何爲天一隅與其苦筋力必欲榮薄軀不如及清時策名於天衢 蘇武別李

陵詩曰骨肉緣枝葉結交亦相因四海皆兄弟誰爲行路人況我連枝樹與子同一身昔爲鴛鴦今爲參與

辰昔在常相近邈若胡與秦惟念當離別思情日已新鹿鳴思野草可以喻嘉賓我有一樽酒欲以贈遠人願

子留斟酌慰我平生親 又別李陵詩曰雙鳧俱北飛一鳧獨南翔子當留斯館我當歸故鄉一別如秦胡會

見何詎央愴恨切中懷不覺淚霑裳願子長努力言笑莫相忘 又別李陵詩曰征夫懷往路起視夜何其參

辰皆已沒去去從此辭行役在戰場相見未有期握手一長歎淚爲生別滋努力愛春華莫忘歡樂時生當復

來歸死當長相思

又蘇武詩曰黃鵠一遠別千里顧徘徊胡馬失其羣思心常依依何況雙飛龍羽翼臨當

乖幸有弦歌曲可以喻中懷請爲遊子吟冷冷一何悲絲竹厲清聲慷慨有餘哀長歌正激烈中心愴以摧欲展清商曲念子不能歸俛仰內傷心淚下不可揮願爲雙黃鵠送子俱遠飛 魏曹植詩曰門有萬里客問君

何鄉人褰裳起從之果得心所親挽裳對我泣太息前自陳本是朔方士今爲吳越民行行將復行去去適西

秦 又詩曰微陰翳陽景清風飄我衣遊魚潛綠水翔鳥薄天飛眇眇客行士徭役不得歸始出嚴霜結今來

白露晞遊子歎黍離處者歌式微慷慨對嘉賓悽愴內傷悲 又送應氏詩曰願得展嬋婉我友之朔方親昵

竝集送置酒此河陽山川迴且遠別促會日長 應瑒別詩曰朝雲浮四海日暮歸故山行役還舊土悲思不

能言悠悠涉千里未知何時旋 又別詩曰浩浩長河水九折東北流晨夜赴滄海海流亦何抽遠適萬里道

歸來未有由臨河累太息五內懷傷憂 晉王浚從幸洛水餞王公歸國詩曰聖主應期運至德敷彝倫神道

垂大教元化被無垠欽若崇古制建侯屏四鄰皇興迴羽蓋高會洛水濱臨川講妙藝縱酒釣潛鱗八音以迭

奏闌羞備時珍估人亦有言爲國不思貧與蒙廟庭施幸得側大鈞羣僚荷恩澤朱顏感獻春賦詩盡下情至

感暢人神長流無舍逝白日入西津泰辭慕華輦侍衛路無因馳情繫帷幄乃心戀軌塵 陸機祖道畢雍孫

劉邊仲潘正叔詩曰皇儲延髦俊多士出幽遐適遂時來運與子遊承華執笏崇賢內振纓曾城阿畢劉贊文

武潘生蒞邦家感別懷遠人願言歎以嗟 又送顧公直詩曰伐鼓五嶺表揚聲萬里外高山何足陵巨海猶

縈帶 又擬庭中有奇樹詩曰芳草忽已茂佳人竟不歸感物戀所歡採此當遺誰 潘岳金谷集詩曰王生

和鼎實石子鎮海沂親友各言適中心悵有違何以叙離思攜手遊郊畿朝發晉京陽夕次金谷潛回轡縈曲

阻峻坂路威夷淙池泛淡淡青柳何依依元醴染朱顏但訴杯行遲投分寄石友白首同所歸 潘尼送盧弋

陽景宣詩曰楊朱焉所哭岐路重別離屈原何傷悲生離情獨哀知命雖無憂倉卒意低迴歎氣從中發灑淚

隨襟顏九重不常鍵閭闔有時開愧無紆衣獻貽言取諸懷 又皇太子集應令詩曰聖朝命方岳爪牙司北

鄰皇儲延篤愛設餞送遠賓誰應今日宴具惟廊廟臣置酒宣猷庭擊鼓靈沼濱羽觴飛醴醪芳饌備奇珍巴

渝二八奏妙舞鼓鐸振長袂生迴風曲裾揚輕塵 孫楚征西官屬於陟陽候祖道送別詩曰晨風飄岐路零

人部

雨被芳草傾城遠相送餞我千里道乖離卽長衢惆悵盈懷抱孰能察其心鑒之以蒼昊 左貴嬪感離詩曰
自我去膝下倏忽踰再期邈邈漫彌遠拜奉將何時披省所賜告情玩悼離詞髣髴想容儀獻歎不自持何時
當奉面娛目於書詩何以訴辛苦告情於文辭 殷仲文送東陽太守詩曰昔人深誠歎臨水送將離如何祖
良遊心事尋在斯虛亭無留賓東川緬逶迤 宋孝武與廬陵王紹別詩曰連歲矜離心今茲幸良集信宿窮
晨暮開顏披所載未盡歡晤懷已傷岐路及軸轡引江介飛旌背爾邑悄擾徒旅戒團樂流景入遲遲分手念
泣泣登路泣 南平王代收波就長路詩曰聳轡高陵曲揮袂廣川濱黃塵昏白日悲風起浮雲蕭條萬里別
契闊三秋分時住從朝露年來驚夕氲徘徊去芳節依遲從遠軍 謝靈運相送方山詩曰祇役出皇邑相期
憩甌越解纜及流潮懷舊不能發析析就衰林皎皎明秋月含情易爲盈遇物難可歇 謝惠連與孔曲阿別
詩曰悽悽乘蘭秋言餞千里舟塗屆雲陽邑邑宰有昔遊行人雖念路爲爾暫淹留 又夜集歎乖詩曰詩人
詠踟躕搔首歌離別誠哉曩日歡展矣今夕切吾生赴遙令質明卽行轍在貧故宜言贈子保溫惠曷用書諸
紳久要亮有摯 鮑照詩曰輕鴻戲江潭孤鴈集洲汜邂逅兩相親同念共無已風雨好東西一隅頓千里追
憶棲宿時聲容滿心耳揚翮不能翔徘徊煙霧裏 又送盛侍郎詩曰北臨出塞道南望入鄉津高塘宿寒霧
平野起秋塵 齊王儉後園餞從兄豫章詩曰茲夕竟何夕念別開曾軒光風轉蘭蕙流月汎虛園 王融奉
辭鎮西應教詩曰末學謝能算高義幸知遊靈庭參辯爽亮苑豫才鄒徘徊歲光晚搖落江樹秋風旗縈別浦
霜瑣迺遙州 又蕭諮議西上夜集詩曰徘徊將所憂惜別在河梁衿袖三春隔江山千里長寸心無遠近邊
地有風霜勉哉勤歲暮敬矣慎容光山中疎未憚杜若空自芳 謝朓別王僧孺詩曰花樹雜爲錦月池皎如
練如何當此時別離言與宴非君不見思所思思不見 又與江水曹詩曰山中上方月故人清樽賞遠山翠
百重迴流映千丈花枝聚如雪垂藤散猶網別後能相思何嗟異風壤 又離夜詩曰玉繩隱高樹斜漢映曾
臺離堂華燭盡別幌清琴哀翻潮尚知恨客思眇難裁山川不可夢況乃故人杯 又將發石頭上烽火樓詩
曰徘徊戀皇邑躑躅躑躅阿陵高堦闕近眺迴風雲多荆吳阻山岫江海合瀾波歸飛無羽翼其如離別何
又新亭者別范雲詩曰洞庭張樂地瀟湘帝子遊雲去蒼梧野水還江漢流停驂我悵望輟棹子夷猶廣平聽

方籍茂陵將見求心事俱已矣江上徒離憂 虞載送友人上湘詩曰濡足送征人褰裳臨水路共盈一樽酒
對之愁日暮漢廣雖容舸風悲未可渡佳期難再得願但論心故沅水日生波芳洲行墜露共知丘壑改同無
金石固 劉繪送別詩曰春蒲方解擇弱柳向低風相思將安寄悵望南飛鴻 張融別詩曰白雲山上盡清
風松下歇欲識離人悲孤臺見明月 梁昭明春日宴晉熙王詩曰百六鍾期數三七厄時中國難悲如燬親
難歡數窮藩搭遊沮夢揚花撫邊戎幸茲同宴醕引滿愛樽空 簡文帝餞廬陵內史王修應令詩曰餞行臨
上節開筵命羽觴迴池瀉飛棟濃雲垂畫堂疎槐未合影反日暫流光園梅斂新豔階蕙結初芳 又餞別詩
曰行樂出南皮宴餞臨華池樽解簾開花閣鳥迷枝窗陰隨影度水色帶風移徒命銜杯酒終成憫別離
又送別詩曰行行異沂海依依別路岐水首隨纜聚岸柳拂舟垂石菌生懸葉江槎流臥枝燭盡悲宵去酒滿
惜將離 沈約侍宴謝朓宅餞東歸應詔詩曰皇情悵東馳羽旆拂南廬夏雲清朝景秋風揚早蟬飲和陪下
席論道光上筵 又侍宴樂遊苑餞徐州刺史應詔詩曰沃若動龍驂參差疑鳳管金塘草未合玉池泉將滿
又侍宴樂遊苑餞呂僧珍應詔詩曰丹浦非樂戰負重切君臨我皇蘊至德忘已用堯心懸茲區宇內魚鳥
失飛沈推轂二嶠道揚旆九河陰超乘蓋三屬選士皆百金戎車出細柳餞席遵上林命師誅後服授律緩前
禽函輟方解帶曉武稍披衿伐罪芒山曲弔民伊水尋將陪告成禮待此未抽簪 又別范安成詩曰平生少
年日分手易前期及爾同衰暮非復別離時勿言一樽酒明日難共持夢中不識路何以慰相思 又送友人
別詩曰君東我亦西銜悲涕如霰浮雲一南北何由展言宴方作異鄉人贈子同心扇遙裔發海鴻連翩出簷
燕春秋更去來參差不相見 又別謝文學詩曰漢池水如帶巫山雲似蓋一望沮漳水寧思江海會以我徑
寸心從君千里外 丘遲侍宴樂遊苑餞徐州刺史應詔詩曰詰旦闔闔開馳道聞鳳吹輕黃承玉輦細草藉
龍騎風遲山尚響雨息雲猶清巢空初鳥飛荇亂新魚戲寔惟北門重匪親孰爲寄參差別念舉肅穆恩波被
小臣信多幸投生豈酬義 范雲之零陵郡次新亭詩曰江干遠樹浮天末孤煙起江天自如合煙樹還相似
滄流未可源高飄去何已 又別詩曰洛陽城東西長作經時別昔去雪如花今來花似雪 又送沈記室夜
別詩曰桂水澄夜氛楚山清曉雲秋風兩鄉怨秋月千里分寒芝寧共採霜猿行獨聞捫蘿正憶我折桂方思

君 又別詩曰孤煙起新豐候馬出雲中草低金城霧木下玉門風別君河初滿思君月屢空折桂衡山北摘蘭沅水東蘭摘心焉寄桂折意誰通 江淹貽袁常侍詩曰昔我別楚水秋月麗秋天今君客吳坂春日媚春

泉幽冀生碧草沅湘含翠煙鏤鏤霞上景惜惜雲外山涉江竟何望留滯空採蓮 又臨秋怨別詩曰四時煎日夜玉露催紫榮始懷未及歎春意秋方驚涼草散螢色衰樹斂蟬聲承君客江潭先愁鴻鴈鳴吳山饒離袂楚水多別情金碧堅不減桂華蘭有英但見一葉落哀恨方未平 又擬古雜體詩曰遠與君別者乃至鴈門

關黃雲蔽千里遊子何時還送君如昨日簷前露已圓不惜蕙草晚所悲道里寒君行在天涯妾身長別離願一見顏色不異瓊樹枝菟絲及水萍所寄終不移 任昉詩曰離燭有窮輝別念無終緒岐言未及申離目已

先舉揆景巫衡阿臨風長楸渚浮雲難嗣音徘徊恨誰與儻有關外驛聊訪狎鷗渚 王僧孺送殷何兩記室詩曰掩袖出南浦驅車送上征飄飄曉雲駛潏潏旦潮平不肖余何惜無貲是勿輕儻有還書便一言訪死生

庚肩吾侍宴餞湘東王詩曰陳王從遊士高宴入承華竝載同連璧雕文類簡沙落後時動樹墜雪暫搖花念此離筵促方愁別路賒 又侍宴餞湘州刺史張續詩曰洞庭資善政層城送遠離九歌揚妙曲八桂動芳

枝兩足飛春殿雲峯入夏池郢路方遼遠湘山轉蔽虧何當好風日極望長沙垂 又餞張孝總應令詩曰層臺臨迴漲耿耿青煙上欲送分符人翻似河隄望寒雲暗積水秋雨蒙重嶂別念動神衿華文切離脫慙無寡和曲空陪郢中唱 又應令詩曰江上早寒生蕭條鏡管清別筵開帳殿離舟卷幔城前山黃葉起對岸白沙

驚臨渦同極望竊吹愧才輕 又侍宴餞東陽太守范子雲詩曰東部資良守北官敦獻酬新枝漸接樹故凍欲含流早花少餘雪春寒極晚秋徒嗟白岸遠空想赤松遊 又新林送劉之遴詩曰旆轉黃山路舟纒白馬

津送輪時合隴分驂各背塵常山喜臨代隴頭悲望秦欲持漢中策還以贈征人 朱超道別席中兵詩曰數年共遊息一旦各聯翩莫論行近遠終是隔山川長波漫不極高岫鬱相連急風亂還鳥輕寒靜暮蟬扁舟已

入浪孤帆漸逼天停車對空渚長望轉依然 吳均送呂外兵詩曰白雲浮海際明月落河濱送君長歎息徒使淚霑巾 又別夏侯故章詩曰白馬黃金羈青驪紫絲鞵新知關山別故人河梁送置此一函書爲余達雲

夢 又酬別詩曰故人杯酒別天清明月亮露下寒葭中風起秋江上衣染潺湲淚棹犯參差浪比首直千金

七寶雕葉狀生離何用表賴此持相餉 又別王謙詩曰嚴光不遂世流轉任飛蓬欲還天台嶺不狎甘泉宮
離歌玉絃絕別酒金卮空儻遺故人念僕在東山東 又贈姚郎詩曰星漢正參差佳人不在此宿昔暫乖阻
何異遠分離露染靡蕪葉日照荒蘭枝風光已飄薄雲采復逶迤勞夢無人覺默默心自知 又贈別詩曰客
子慘無歡送別江之干白雲方渺渺黃鳥尚關關紛紛巫山石合沓洞庭瀾行衣侵曉露征舸犯夜湍無因停
合浦見此去珠還 又贈別詩曰樹響浹山來猿聲繞岫急旅帆風飄揚行巾露霑濕深浪聞兼葭濃雲沒城
邑不見別離人獨有相思泣 又贈別詩曰君留朱門裏我至廣江濱城高望猶見風多聽不聞流蘋方繞繞
落葉尚紛紛無由得共賞山川間白雲 何遜與胡興安夜別詩曰居人行轉軾客子暫維舟念此一言笑分
爲兩地愁露濕寒塘草月映清淮流方抱新離悵獨守故園秋 又從鎮江州與遊故別詩曰歷稔共追遊一
旦辭羣匹復如東流水未有西歸日夜雨滴空階曉燈暗雕室相悲各罷酒何時更促膝 蕭琛別詩曰落日
總行轡薄別在江干遊客無淹期晨川有急瀾分手信云易相思誠獨難之子兩特達伊余日盤桓俟我式微
歲共賞階前蘭 蕭子範侍宴餞陸倕應令詩曰儲皇餞離送廣命傳羽觴侍遊追曲水開宴等清漳新泉已
激浪初卉始含芳雨罷葉增綠日斜樹影長 劉孝綽侍宴餞庾於陵應詔詩曰皇心眷將遠悵餞靈芝側是
日青春獻林塘多秀色芳草疑綸組嘉樹似雕飾遊絲綴鶯領光風送綺翼下輦朝旣盈留宴景將昃高辯競
談端奇文爭筆力伊臣獨無伎何由奉吹息 又侍宴餞張惠紹應詔詩曰滄池誠自廣蓬山一何峻麗景花
上鮮油雲葉裏潤風度餘芳滿鳥集新條振餞言班俊造光私獎輶舡徒然謬反隅何以窺重仞 又侍離宴
詩曰輟轅東北望江漢西南永羽旗映日移鐃吹臨風警令王懸追送纜舟餞餞傾掩袂望征雲銜杯惜餘景
首燕徒有心局步何由騁 又應令詩曰鮮雲積上月東雨晦初陽迴風飄淑氣落景換新光竹萌始防露桂
挺已含芳瑤堦變杜若玉沼發橫將聖矜惜岐路曲宴闌蘭堂 又江津寄劉之遴詩曰與子如黃鵠將別復
徘徊經過一柱觀出入三休臺共攜雲氣藻同舉霞文杯佳人每曉遊禁門恒晚開欲寄一言別高駕何由來
宗夫詩曰別酒正參差乖情將陸離悵焉臨桂苑懸默瞻華池輕雲流惠采時雨亂清漪眇眇追蘭徑悠悠
結芳枝眷言終何託心寄方在斯 劉顯發新林浦贈同省詩曰迴首望歸途山川邈離異落日懸秋浦歸鳥

飛相次感物傷我情惆悵懷親懿 劉孺待宴餞新安太守蕭幾應令詩曰芝殿延薄景畫室寫油雲元覽多
該洽聖思究前聞微密探精義優游妙典墳飲餞參多士贈言賦新文 張績待宴餞東陽太守蕭子雲詩曰
仲月發初陽輕寒帶春序渌池解餘凍丹霞霽新雨良守謁承明祖舟戒蘭渚皇儲惜將邁金樽留宴醕 周
王褒入關故人送別詩曰百年餘古樹千里關黃塵關山行就近相看成遠人 又別陸才子詩曰解纜出南
浦征棹且凌晨還看分手處唯餘送別人中流搖蓋影邊江落騎塵平湖開曙日細柳發新春滄波不可望行
雲聊共因 又別王都官詩曰連翩憫流水悽愴惜離羣東西御溝水南北會稽雲河橋兩隄絕橫岐數路分
山川遙不見懷袖遠相聞 庾信應令詩曰望別非新館開舟即舊灣浦喧征棹發亭空送客還路塵猶向水
征帆獨背關 又和保法師詩曰秦關望楚路灞岸想江潭幾人應落淚看君馬向南 又和侃法師詩曰客
遊經歲月羈旅故情多近學衡陽鴈秋分俱度河 又和侃法師詩曰回首河隄望眷眷嗟離絕誰言舊國人
到在他鄉別 又寄王琳詩曰玉關道路遠金陵信使疎獨下千行淚開君萬里書 又別周弘正詩曰扶風
石橋北函谷故關前此中一分手相逢知幾年黃鵠一反顧徘徊戀愴然自知悲不已徒勞減瑟絃 陳周弘
正隴頭送征客詩曰朝霜侵漠草流沙度隴飛一聞流水曲行住兩霑衣 又答林法師詩曰客行七十歲歲
暮遠徂征寒雲結不解隴水凍無聲君看日近遠爲憶長安城 徐陵新亭送別應令詩曰鳳吹臨伊水時駕
出河梁野燎村田黑江秋岸荻黃隔城聞上鼓迴洲隱去檣神襟愛遠別流睇極清漳 又別毛永嘉詩曰願
子屬清規歸來振羽儀嗟余今老病此別恐長離白馬君來哭黃泉我詎知徒勞脫寶劍空挂隴頭枝 張正
見征虜亭送新安王應令詩曰鳳吹臨南浦神駕餞東平亭迴漳水乘旆轉洛濱笙地凍班輪響風嚴羽蓋輕
燒田雲色暗古樹雪花明岐路一迴首流襟動眷情 又秋日別庾正負詩曰征途愁轉旆連騎慘停鑣朔氣
凌疎木江風送上潮青雀離帆遠朱鷺別路遙唯有當秋月夜夜上河橋 陰鏗送始興王詩曰良守別承明
枉道暫逢迎去帆收錦纜歸騎指蘭城紛紜連山暗潺湲派水清桂晚花方白蓮秋葉始輕背飛傷客念臨岐
闕聖情分風不得遠何由送上征 又江津送劉光祿不及詩曰依然臨送渚長望倚河津鼓聲隨聽絕帆勢
與雲鄰泊處空餘鳥離亭已散人林寒正下葉釣晚欲收綸如何相背遠江漢與城闔 又廣陵岸送北使詩

曰行人引去節送客艤歸艫即是觀濤處仍爲郊贈衢汀洲浪已息邗江路不紆亭斯背樞馬橋轉向風烏海上春雲雜天際晚帆孤離舟對零雨別渚望飛鳧定知能下淚非但一楊朱 江總別袁昌州詩曰河梁望隴

頭分手路悠悠徂年驚若電別日欲成秋黃鵠飛飛遠青山去去愁不言雲雨散更似東西流 又賦得攜手

上河梁應詔詩曰早秋天氣涼分手關山長雲愁數處黑木落幾枝黃鳥歸猶識路流去不知鄉秦川心斷絕

何悟是河梁 又別袁昌州詩曰客子歎途窮此別異西東關山嗟墜葉岐路憫征蓬別鶴聲聲遠愁雲處處

同 又別賓化侯詩曰分岐泣世道念別傷邊秋斷山時結霧平海若無流驚鷺一羣起哀猿數處愁是日送

歸客爲情自可求 又別永新侯詩曰送君張掖郡分悲函谷關欲知腸斷絕浮雲去不還 **唐**沈佺期古

別詩曰白水東悠悠中有西行舟舟行有返櫂水去無還流奈何生別者戚戚懷遠遊自君闕芳躋青陽四五

道皓月掩蘭室光風虛蕙樓相思無明晦長歎累春秋離居久遲暮高駕何淹留 陳子昂送客詩曰故人洞

庭去楊柳春風生相送河洲晚蒼茫別思盈白蘋已堪把綠芷復含榮江南多桂樹歸客贈平生 李白金鄉

送韋八之西京詩曰客自長安來還歸長安去狂風吹我心西掛咸陽樹此情不可道此別何時遇望望不見

君連山起煙霧 又贈別王山人歸布山詩曰王子析道論微言破秋毛還歸布山隱興入雲天高爾去安可

遲瑤草恐衰歇我心亦懷歸屢夢松上月 杜甫新婚別詩曰免絲附蓬麻引蔓故不長嫁女與征夫不如棄

路旁結髮爲妻子席不暖君林暮婚晨告別無乃太匆忙君行雖不遠守邊赴河陽妾身未分明何以拜姑嫜

擅欲隨君去形勢反蒼黃勿爲新婚念努力事戎行人事多錯迕與君永相望 又垂老別詩曰四郊未寧靜

垂老不得安子孫陣亡盡焉用身獨完投杖出門去同行爲辛酸幸有牙齒存所悲骨髓乾男兒既介冑長揖

別上官老妻卧路啼歲暮衣裳單孰知是死別且復傷其寒此去必不歸還聞勸如餐棄絕蓬室居塌然摧肺

肝 又無家別詩曰寂寞天寶後國廬但蒿藜我里百餘家世亂各東西存者無消息死者爲塵泥賤子因陣

敗歸來尋舊蹊久行見空巷日瘦氣慘悽縣吏知我至召令習鼓鼙永痛長病母五年委溝溪生我不得力終

身兩酸嘶人生無家別何以爲蒸黎 又夢李白詩曰死別已吞聲生別常惻惻江南瘴癘地逐客無消息故

人入我夢明我常相憶恐非平生魂路遠不可測魂來楓林青魂返關塞黑君今在羅網何以有羽翼洛月滿

屋梁猶疑照顏色水深波浪闊無使蛟龍得 王維送別詩曰下馬飲君酒問君何所之君言不得意歸卧南山陲但去莫復問白雲無盡時 又齊州送祖三詩曰相逢方一笑相送還成泣祖帳已傷離荒城復愁入天寒遶山淨日暮長河急解纜君已遙望君猶佇立 又觀別者詩曰青青楊柳陌陌上別離人愛子遊燕趙高堂有老親不行無可養行去百憂新切切委兄弟依依向四鄰都門帳飲畢從此謝親賓余亦辭家者看之淚滿巾 常建送李十一尉臨溪詩曰泠泠花下琴君唱渡江吟天際一帆影預懸離別心言念神仙尉因致瑤華音回軫撫商調越溪澄碧林 錢起酬王維春夜竹亭贈別詩曰山月隨客來主人興不淺今宵竹林下惟覺花源遠惆悵曙鶯啼孤雲還絕嶽 韋應物送李儋詩曰別離何從生乃在親愛中及念行路子拂衣自西東日是不留宴嚴車出崇墉行遊非所樂端憂道未通春野百卉發清川思無窮歸當掩重關默想音容王縉古別離詩曰下堦欲離別相對映蘭叢含辭未及吐淚落蘭叢中高堂靜秋日羅衣飄暮風誰能待明月迴首見牀空 孟雲卿古別離詩曰朝日上高堂離人怨秋草但見萬里天不見萬里道君行本遙遠苦樂良難保宿昔夢同衾憂心常傾倒含酸欲誰訴展轉傷懷抱結髮年已遲征行去何早少壯無會期水深風浩浩孟郊古怨別詩曰颯颯秋風生愁人怨離別含情兩相向欲語氣先咽心曲千萬端悲來却難說別後唯所思天涯共明月 許渾汾上燕別詩曰雲物如故鄉山川知異路年來未歸客馬上春欲暮一樽花下酒落日水西樹不待管絃終搖蕩背花去 宋梅堯臣與蔣秘別二十六年田柴二十年羅拯十年始見之詩曰我今五十二嘗苦離別煎屈指數離別正去一半年三君異出處相見有後先蔣最會遇早羅倍晚於田仕宦比我遲官資居我前此亦漫輕重無限歸荒埏所喜笑語同各驚顏貌遷 陳師道送內詩曰鹿麋顧其子燕雀各有隨與子爲夫婦五年三別離兒女豈不懷母老妹已笄父子各從母可喜亦可悲關河萬里道子去當何歸三歲不可道白首以爲期吞聲不敢盡欲怨當歸誰 歐陽修別後寄聖俞詩曰長河秋雨多夜插寒潮入歲暮孤舟遲客心飛鳥急離合二十年乖睽多聚集常時飲酒別今別輒飲泣君曰我老矣不覺兩袖濕我年雖少君白髮已揖揖憶初京北門送我馬暫立自茲遭檻穽一落誰引汲但令身尚在果得手重執歡言正喧譁別意忽於邑日暮北亭上濁醪聊共挹輕橈動翩翩晚水明熠熠行心去雖迫訣語出猶澀歎吁偶成篇聊用

綴君什 黃庭堅贈別李端叔詩曰我觀江南山如目不受垢憶食江南薇子獨於我厚在北思江山如懷冰雪顏千峰上雲雨岑絕何由攀白玉著石中與物太落落涇渭相將流世不名清濁我行風雨夜船窗聞遠雞故人不可見故人心可知 陸游送子龍赴吉州掾詩曰我老汝遠行知汝非得已駕言當送汝揮涕不能止人誰樂離別坐貧至於此汝爲吉州吏但飲吉州水一錢亦分明誰能肆譏毀我食自可營勿用念甘旨益公名位重凜若喬嶽峙汝以通家故或許望燕几得見已足榮切勿有所啟又若楊誠齋清介世莫比汝但問起居餘事勿挂齒汝去三年歸我儻未即死江中有鯉魚頻寄書一紙 王十朋別太學同舍詩曰二年客函關傾蓋皆故人況我同舍郎何異手足親養鹽共牢落燈火同悲辛坐覺歲月忘所賴朋友仁西風起天末浙瀝吹江蘋思歸適所願惜別還霑巾祖席歌驪駒別腸轉車輪離索恐孤陋重來約新春 翁卷思遠客詩曰涉夏思已深感秋念愈迫思念皆爲誰爲彼速行客客行曷辰休悵望朝復夕邀邀阻前歡悠悠抱今戚中庭一株橘嘉實轉金碧爰意花開時花邊語離析惜此不忍餐留之候君摘擬君君未來回腸更加折何當乘夢時儻遂徵容覲 徐璣漳州別王仲言詩曰百草各有種春至不栽培交情重故知豈論才不才相識十年初再見天之涯共飲一杯酒慙若紅顏開人生有此樂知復能幾回朔風從何來吹發枝上梅天寒日欲暮又乃行色催

魏曹植別友詩曰涼風肅兮白露滋木感氣兮條葉辭臨淒水兮登重基折秋華兮采靈芝尋永歸兮贈所思感離隔兮會無期伊鬱悵兮情不怡 唐王適古別離詩曰昔歲驚楊柳高樓悲獨守今年芳樹枝孤棲怨別離珠簾晝不捲羅幔曉長垂苦調琴先覺愁容鏡獨知頻年鴈去無消息罷却鴛紋何用織夜還羅帳空有情春著裙腰自無力青軒桃李落紛紛紫庭蘭蕙日氛氲已能憔悴今如此更復含情一待君 李白金陵酒肆留別詩曰風吹柳花滿店香吳姬壓酒勸客嘗金陵子弟來相送欲行不行各盡觴請君試問東流水別意與之誰短長 杜甫惜別行送向卿進奉端午御衣之上都詩曰肅宗昔在靈武城指揮猛將收咸京向公泣血灑行殿佐佑卿相乾坤平尚書勲業超千古雄鎮荊州繼吾祖裁縫雲霧成御衣拜跪題封賀端午向卿將命寸心赤青山落日江湖白卿到朝廷說老翁漂零已是滄浪客 高適贈別晉處士詩曰有人家住清河源

渡河問我遊梁園手持道經注已畢心知內篇口不言盧門十年見秋草此心惆悵誰能道知已從來不易知
慕君爲人與君好別時九月桑葉疎出門千里無行車愛君且欲君先達今上求賢早上書 白居易生別離
詩曰黃河水白黃雲秋行人河邊相對愁天寒野曠何處宿棠梨葉戰風颼颼生離別生離別憂從中來無斷
絕憂積心勞血氣衰末年三十生白髮 李頎琴歌送別詩曰主人有酒歡今夕請奏鳴琴廣陵客月照城頭
烏半飛霜淒高樹風入衣銅鑪華燭燭增輝初彈綠水後楚妃一聲已動物皆靜四座無言星欲稀清淮奉使
千餘里敢告雲山從此始 王建寄遠曲曰美人別來無處所巫山月明湘江雨千回相見不分明井底看星
夢中語兩心相對尚難知何況萬里不相疑 張籍送遠曲曰戲馬臺南山簇簇山邊飲酒歌別曲行人醉後
起登車席上回尊勸僮僕青天漫漫覆長路遠遊無家安得住願君到處自題名他日知君從此去 宋梅堯
臣醉中留別永叔子履詩曰新霜未落汴水淺輕舸唯恐東下遲遠城假得老病馬一步一跛令人疲到君官
舍欲取別君惜我去頻增嚙使步騎奴呼千履又令開席羅酒厄烹雞炮兔下飭美盤實飢餒栗與梨蕭蕭細
雨作寒色厭厭盡醉安可辭六街禁夜猶未去童僕竊訝吾僂癡但願音塵寄鳥翼慎勿却效兒女悲 歐陽
脩贈別劉原父詩曰憶昨君當使北時我往別君飲君家愛君小鬟初買得如手未觸新開花歸來不記與君
別酒醒起坐空咨嗟豈知前後不相及歲月忽忽行無涯客心漸遠誠易感見君雖晚行莫加我後君歸祇十
日君先躍馬未足誇人生每苦勞事役老去尚能憐物華從今有暇即相過安得載酒長盈車 蘇軾鄭州別
子由詩曰不飲何爲醉兀兀此心已逐歸鞍發歸人猶自念庭闈我今何以慰寂寞登高回首坡隴鴈惟見烏
帽出復沒苦寒念爾衣裘薄獨騎瘦馬踏殘月路人行歌居人樂僮僕怪我苦悽惻亦知人生要有別但恐歲
月去飄忽寒燈相對記疇昔夜雨何時聽蕭瑟君知此意不可忘慎勿苦愛高官職 又送陳睦知潭州詩曰
華清縹緲浮高棟上有頴林藏石甕一杯此地初識君千巖夜上同飛鞚君時年少面如玉一飲百觚嫌未痛
白鹿泉頭山月出寒光潑眼如流汞朝元閣上酒醒時臥聽風聲鳴鐵鳳舊遊空在人何處二十三年真一夢
我得生還雪滿鬢君亦老嫌金帶重有如社燕與秋鴻相逢未穩還相送洞庭青草渺無際天柱紫蓋森欲動
湖南萬古一長嗟付與騷人發嘲弄 楊萬里爲丞零陵代者未至送親攜老幼先歸詩曰吾父先歸吾未可

吾母已行猶顧我兒女喜歸不解悲我愁安得如兒癡牆頭人看不須羨居者那知行者歎昨日幸晴今又雨
天公管得行人苦吾母病肺生怯寒晚風鳴屋正無端人家養子要作官吾親此行誰使然 又送王監簿民
瞻南歸詩曰潮頭打雲雲不留月波潑窗窗欲流夜寒報晴豈待曉天公端爲盧溪老盧溪在山不知年盧溪
出山即日還黃紙苦催得高卧青霞成癖誰能那詔謂先生式國人掉頭已復煙林深路傍莫作兩疏看老儒
不用橐中金 陸游古別離詩曰孤城窮巷秋寂寂美人停校夜歎息空園露濕荆棘枝荒溪月照狐狸迹憶
君去時兒在腹走如黃犢爺未識紫姑吉語元無據况憑瓦兆占歸日嫁來不省出門前夢魂何因識酒泉粉
綿磨鏡不忍照女子感時無十年 元貫雲石別離情曰吁別離之苦今蒼梧之野春草青黃陵廟前春水生
日暮湘裙動輕翠玉樹亭亭染紅淚又聞垓下虞姬泣斗帳初驚楚歌畢佳人闌淚弃英雄劍血不銷原草碧
何物謂之別離情肝腸剝剝如銅聲不如斫其竹剪其草免使人生爲情老 薩天錫西樓別寄閩憲諸公詩
曰八月八日溪上別溪上彩旗紅獵獵離情已逐渡江雲邊草連天剪秋色玉驄金虎諸大夫欲別不別留斯
須沙明淺渚白鳥下酒盡落日青山孤丈夫有淚不須灑去客掛帆君上馬悠悠回首各東西惟見西溪捕魚
者閩關一片月太行一片雲鴈書遠寄隔山嶽雲飛月明多憶君 又春別詩曰花氣壓簾愁不埽細雨翻
長芳草玉釵燕尾剪春寒坐惜流年鏡中老東風吹柳人不知春嬌滿眼顰雙眉吳松錦字夢中得曉來月落
聞烏啼南園日暖蝴蝶醉香霧熏人海棠睡朱門小立蹴金蓮落紅起作離人淚 明李夢陽送大司馬劉大
夏歸東山草堂歌曰東山有草堂縹緲雲嶠孤前對祝融峯下瞰巴陵湖明公昔時此堂居麋鹿熊豕當窗趨
洞庭日落風浪湧倒影射堂堂欲動慘淡誰聞紫芝曲獨善不救蒼生哭先帝親裁五色詔老臣曾受三朝祿
此時邊徼多戰聲曳履謁帝登承明謝安笑却淮淝敵魏相坐測單于兵九重移榻數召見夾城日高未下殿
英謀密語人不知左右微聞至尊羨自從龍去不可攀公亦卧病思東山湘娥含笑倚竹立山鬼窈窕堂之側
上書苦死只欲歸聖旨優容意悽惻內府盤螭縷金織賜出傾朝甘動色白金之鉞紅票記寶鈔生硬鴉翎黑
崇文城門水雲白是日觀者塗路塞城中冠蓋盡追送塵埃不見長安陌人生富貴豈有極男兒要在能死國
不爾抽身早亦得君不見漢二疏千載想慕傳畫圖即如草堂何處無採食覲竊胡爲乎乃知我公具丈夫鳴

呼乃知我公眞丈夫 何景明同崔子送劉以正還關中詩曰燕川芳草歇已久行子西行更回首駿馬春倖渭曲花金鞭暮指秦中柳看君兄弟皆豪雄十年側想中丞公東山雲月卧未起北海賓客誰相通荷花初紅酒初碧汝歸登堂見顏色若問長安舊友生崔何二子常相憶 楊慎離席行送彭二詩曰吾子從軍巴蜀山橫戈千里何間關坐使麒麟日月換行收魚鳥風雲閑文武才名歸一姓兄弟繁華許誰竝起晚已謝時運傾當陽再覩乾坤正陟岡在原來復返海水天風歲將晚行行白馬燕雪深飛飛黃鵠秦雲遠離堂命酒羽觴疾畢昂盈軒月東出主人流連客離席慷慨爲子歌今夕 盧柟送友人南還詩曰鳳凰樓外雲氣長青袍白馬生輝光送君千里促羽觴鳴等清歌如故鄉相思明日忽分手誰把青驄繫綠楊 俞允文征馬嘶送歸有光詩曰白楊花飛江水黑江頭行人頭盡白青山日出煙塵昏馬上誰爲都門客都門豪客長安兒蒲萄百斛柳千絲戎裝玉駿邯鄲姬虎旗獵獵紅鴉啼長安三月春未暮城中不見遊人歸遊人歸醉滿堤青草長征馬嘶

增唐杜甫送賈閣老出汝州詩曰西掖梧桐樹空留一院陰艱難歸故里去住損春心官殿青門隔雲山紫邏深人生五馬貴莫受二毛侵 又送遠詩曰帶甲滿天地胡爲君遠行親朋盡一哭鞍馬去孤城草木歲月晚關河霜雪清別離已昨日因見古人情 又贈別何邕詩曰生死論交地何由見一人悲君隨燕雀薄宦走風塵綿谷元通漢沱江不向秦五陵花滿眼傳語故鄉春 又江亭王閬州筵餞蕭遂州詩曰離亭非舊國春色是他鄉老畏歌聲短愁隨舞曲長二天開寵餞五馬爛生光川路風塵接俱宜下鳳凰 祖詠江南旅情詩曰楚山不可極歸路但蕭條海色晴看南江聲夜聽潮劍留南斗近書寄北風遙爲報空潭橘無媒寄洛橋 劉長卿穆陵關北送人歸漁陽詩曰逢君穆陵路匹馬向桑乾楚國蒼山古幽州白日寒城池百戰後者舊幾家殘處處蓬蒿徧歸人掩淚看 錢起別張起詩曰有別時留恨銷魂況在今風濤初振海鷗鷺遠辭林舊國關河絕新秋草露深陸機嬰世網應負故山心 皇甫冉贈莊訥詩曰世故還相見天涯共向東春歸江海上人老別離中都吏名何晚沙鷗道自同甘泉須早獻且莫歎飄蓬 姚係古別離詩曰涼風已嫋嫋露重木蘭枝獨上高樓望行人遠不知輕寒入洞戶明月滿秋池燕去鴻方至年年是別離 韓愈祖席詩曰淮南悲木落而我亦傷秋況與故人別那堪羈宦愁榮華今異路風雨苦同憂莫以宜春遠江山多勝遊 張籍別北旅思

詩曰日日望鄉國空歌白苧詞長因送人處憶得別家時失意還獨語多愁祇自知客亭門外柳折盡向南枝

白居易原上草詩曰離離原上草一歲一枯榮野火燒不盡春風吹又生遠芳侵古道晴翠接荒城又送王孫去萋萋滿別情 賈島旅遊詩曰此心非一事書札若爲傳舊國別多日故人無少年空巢霜葉落疎牖水

螢穿留得林僧宿中宵坐默然 馬戴早發故園詩曰語別在中夜登車離故鄉曙鐘寒出岳殘月迴凝霜風柳條多折沙雲氣轉黃行逢海西鴈零落不成行 又送人遊蜀詩曰別離楊柳陌迢遞蜀門行若聽青猿後

應多白髮生虹霓侵棧道雨雪雜江聲過盡愁人處煙花是錦城 薛能送友人出塞詩曰榆關到不可何況出榆關春草臨岐斷邊樓帶日開人歸穹帳外鳥發廢營間此地秋堪想霜前作意還 溫庭筠送人東遊詩

曰荒戍落黃葉浩然離故關高風漢陽渡初日郢門山江上幾人在天涯孤棹還何當重相見樽酒慰離顏又商山早行詩曰晨起動征鐸客行悲故鄉雞聲茅店月人跡板橋霜樹葉滿山路枳花明驛牆因思杜陵夢

鳬鴈滿迴塘 宋楊萬里別教授吳景衡詩曰道合從人笑情親覺別難得閒何恨晚到老幾相看世路今逾窄吾徒却自寬此心各相勉不但道加餐 又清早出城別王宣子舍人詩曰月細惟愁落陽昇未要忙出門

雞未覺夾路稻初香涉世寧容懶侵星幸稍涼病來詩久廢覓句費商量 陸游送仲高兄秩滿赴行在詩曰兄去遊東閣才堪直北扉莫憂持橐晚姑寄乞身歸道義無今古功名有是非臨分出苦語不敢計從違 王

十朋送劉方叔兼簡全之詩曰相見無多日依前又索居斷魂梅的皪過眼柳蕭疎匹馬來時路征鴻別後書君歸見溫叟爲我問何如 又送陳商霖詩曰相逢猶未款作別太匆匆日落江東暮人歸冀北空音塵應暫

隔談笑更誰同回首蕭峰外明朝我亦東 戴復古送行詩曰荏苒歲云暮雪霜天正寒取程母太急御下放教寬朝夕去家遠關山行路難邊頭辦功業恐不在儒冠 又代人送別詩曰南浦春波碧東風送客船別君

楊柳外揮淚杏花前粉壁題詩句金釵當酒錢一聲離岸櫓心碎楚江邊 翁卷送人遊天台詩曰暫遊行李少幾日到天台船帶落潮發月從前浦來花源香不斷藥地綠成堆莫學他劉阮經年忘却回 又留別吳中

士友詩曰羈遊雖不開幽思亦相關今日經行處他宵夢寐間松江雲在水茂苑樹成山況復多吟客令人懶欲還 趙師秀楊柳塘寄徐照詩曰因貧爲遠別已是十三程盡日行山色逢人問地名近書無便寄新句與

誰評想爾寒宵雨思子亦夢成

徐照送翁靈舒遊邊詩曰孤劍色磨青深謀秘鬼靈離山春值雪憂國夜觀

星奏凱邊人悅餘營戰地腥期君歸幕下何石可書銘

又懷趙紫芝詩曰一別一百日無書直至今幾回成

夜夢獨自發秋吟小雪衣猶給荒年米似金知音人亦有誰若爾知心 徐璣中川別弟詩曰中川人語別南

國夜何其江迴風來急山低月落遲纔從前浦遠角在古城吹五畝耕鋤地何當手共犁 又送徐照先回京

師詩曰骨體先如鶴離家歲已周欲知詩思遠曾共楚鄉遊窮達身將老分攜菊正秋江西看舊友歸計少遲

留 又別趙黃中詩曰世道難爲友相期一見中但令心事合不在語言同秋早湘煙白舟移寥岸紅別懷如

迴野長與水雲通 元虞集奉別阿魯來東泉學士遊甌越詩曰憶昔同經幄春明下玉池掛冠俄去國連舸

總盛書筍脯膏紅稻蓴羹斫白魚莫言江海遠咫尺玉堂廬 明劉基題朱孟章虞學士送別圖後詩曰秋郊

一杯酒握手念將離落日照野水涼風生樹枝今日重相憶青山如舊時鬚毛非松柏爭得不成絲 高啟楓

橋送丁鳳詩曰紅葉寺前橋停君晚去橈醉應忘世難歸不計程遙山隱初沉日風催欲上潮離魂來此處還

似灞陵銷 又送易從事祖飲南渚詩曰疎楊映老荷別處最秋多送客年年路愁人日日波霞明添醉色風

急斷離歌莫謂官程促青山易看過 宋濂送許時用還剡詩曰尊酒都門外孤帆水驛飛青雲諸老盡白髮

幾人歸風雨魚羹飯煙霞鶴氅衣因君動高興予亦夢柴扉 邊貢留別張西盤大參詩曰滿酌豈辭醉未行

先憶君山城稀見蒨關樹不開雲地入河源渺天連塞日曛那堪北來鴈偏向別時聞 何景明送呂子詩曰

京洛三年客雲霄萬里達上書俱不報解珮獨先歸北極臨燕甸南山繞漢畿相將未可料岐路斷蓬飛 楊

慎折楊柳詩曰白雪新年盡東風昨夜驚芳菲隨處滿楊柳最多情染作春衣色吹爲玉笛聲如何千離別只

贈一枝行 謝榛秋夜烏給事宅言別詩曰故人同此夜離思且銜杯古樹當庭合流螢到席回燭花留我醉

諫草識君才異日關河隔秋鴻幾北來 李攀龍別李戶曹詩曰舊游京陌滿何處瑀貂行念子從王事令人

識宦情春風吹遠別芳草送孤征莫歎謀身拙前賢重請纓

唐李白別中都兄明府詩曰吾兄詩酒繼陶君試宰中都天下聞東樓喜奉連枝會南陌愁爲落葉分城隅

綠水明秋日海上青山隔暮雲取醉不辭留夜月鴈行中斷惜離羣 李頎送魏萬之京詩曰朝聞遊子唱騷